

CYEYEMENU



Twasakidila, mwaneetu. Twasakidila, Mwaneetu Hoekstra.

Mwoyi wa diloolo edi, kùdi beena Houston. Ncya bushuwa ne ndi mbala eci bu dyèsè dinene, dya kusanganyiibwa cyakabidi muneemu mu Houston diloolo edi. Kùkaadi bidimu byàbûngì kacya ngâpeta dyèsè dya kwikala muneemu. Nenku ndi musômbe, munkaci mwa kuteeleja diloolo edi yônsò wa ku baakudi aba.

² Nenku dituku adi, pâmvwà mudyanjile kulongolola maalu bwa cintu kampanda cikwabo, mwaba mukwabo, nenku mêmè kumanya ne bânà abu bàvwa bakungamangane ne lufu, mêmè kudyambidila ne: “Bu cintu kampanda mwa kwenzekela bânà abu, ncyèna mufwanyineku kudifwila mêmè mwine luse to,” bwa kupanga kulwa kaaba aka ne kufilaku wanyi mmwenenu ne kwenza mwanyi pàànyì mùndì mufwanyine kwenza amu, bwa kukwacishaku maamù ewu ne taatù, ne bwa biine bânà aba, ne kwenzaku cyônsò cîndì mufwanyine kwenza bwa kusungila myoyi yabo.

³ Ne Houston mwine ùdi ne...mmwaba wa civulukilu bwanyi mêmè. Mmulame bivulukilu binène byàbûngì bîntù munange bikole kacya anu mwine musangu awu wûngààkalwà kwendelangana muneemu emu bwa musangu wa kumpala kùkaadi bidimu byàbûngì, kaaba aka ku Herald Of Faith, Mwaneetu Kidson, ne pashiishe ku dibalaasa eku musangu wûmvwà muneemu emu pamwe ne Mwaneetu Raymond Richey ne bambi bàà mu cimenga eci.

⁴ Ne pashiishe, mu bushuwa bwa bwalu, Mukalenge Ayers, Mukalenge Kipperman, diloolo òvwà cyamu cya fôtô cijaadike ne mêmè ncivwa ngamba cintu kampanda cya mafi nansha. Civwa m’Bulelela. Nenku pàvwà dîsù dya byamu bilamakaja dya cyamu cya fôtô dikwàte eikeena-kumona aci cya...anyi, kî ncikeena-kumona to; cintu cya dya bushuwa. Kilisto mwine utùdì tuyiisha ne banange bikole awu, ùvwa neetu. Yèyè ùtu mulaye bwa kwikala neetu, nenku cyamu cya fôtô kuMukwataci fôtô. Nkàadi mwambambe misangu ne misangu, mu bikondo bishààle, ne—ne mvwa mmona Bukênkè abu dîbà dyônsò. Kadi misangu mikwabo bantu bàvwa bafwanyine kwikala ne mpatà ndambu bwa Cyôci aci, ne nudi mwa kwitabuuja ne bàdì anu bafwanyine kwikala mushindu awu, kadi diloolo adi cyakacijaadika. Awu wùvwa mmusangu wa nzànzànzà wa kukwaciibwaCi fôtô.

⁵ Kubangila anu apu, mbaCikwatekwate fôtô misangu ne misangu. Mu Allemagne anu abidi àdì panshi aa, cipweka, pàvwà dilaabiibwa dyenzèke, ne pàkaalukilàCi kabidi. Nenku

bintu abi kabitu bwa kutumbisha muntu kampanda to, kadi bidì mbwà kushindika Bwikadi bwa Yesu Kilisto munkaci mwa cisàmbà Cyende.

⁶ Ne twètù tudi twitabuujà ne Mukalenge Yesu umwèumwè awu ùdi kaaba aka diloolo edi, bwa kutwambulwishaku mu cilumbù eci. Ne ndi ngiitabuujà ne bwalu ebu mbuMutwe ku mwoyi kutamba mudibu bufwanyine kututwa twètù ku mwoyi. Nenku ncyà bushuwa ne mèmè ndi ngumvwila baledi bàà bàna aba luse, ne mwikàle ne meeji amwe ne mulume yònsò ne mukaji yònsò udi uteeta bwa kbasungila mu mbanga ya lufu awu.

⁷ Nenku, mpindyewu, ndi muumvwe bàmba ne eci kî ndisangisha dya ditabuluja nansha, kadi cìdi anu masangisha a mulongolongo a—a milombo àdì enjiibwa bwa misuuka yìdì yisanganyibwa mu mindidimbi ya lufu eyi. Ne pa nanku ndi mucyelewe. Ncyakwakula ntanta mule menemene to.

⁸ Kadi ndi njinga kupatulaku cyena-bwalu, anyi, dyumvwija kampanda's we, mu bidì bifùnda bìndì njinga kubala mu myaba yibidi mu Mifundu. Nenku nwènù bàdì ne Bibles, bu nwènù mwa kubuululaku naanyi anu bwa katanci cyanàànà, mu mukanda wa Filipinoyi, nshapita 1, ku mvensa wa 20 wa nshapita 1 wa Filipinoyi.

Bilondeshile dindila dyanyi dikole ne ditekemena dyanyi, ne mu cintu nansha cimwe ncyakuumvwaku bundu to, kadi. . . ne bukutu bwònsò, bu mùtùbi misangu yònsò, pa nanku mpindyewu kabidi Kilisto neikalè mwa kutumbishiibwa mu mubidi wanyi, nansha ciikàle cinganyi. . . mwoyi, anyi. . . lufu.

⁹ Ne pashiishe, kabidi, mu Mukanda wa Byenzedi, nshapita mwi2 ku mvensa wa 30. Ndi mufwanyine kubala mvensa wa 25 kuya too ne ku wa 30.

Bwalu Davidi wàkaakula bwa bwalu bwende, bwalu mvwa mudyanjile kumona Mukalenge misangu yònsò kumpala kwanyi, bwalu yèyè ùdi ku dyabalume dyanyi, bwa ncìkadi ngányungishibwa to.

Ki bwa cinyi mwoyi wanyi wàkasànka, ne ludimi lwanyi lwakacyonkomoka; kabidi mubidi wanyi newikishe mu ditekemena,

Bwalu Mèmè ncyakulekela musuuka wanyi mu iferno to, anyi Ncyakwitaba bwa Wa Cijila webe amone dibola nansha.

Wèwè udi mummanyishe njila wa mwoyi, neunguuje tente ne disanka ku mèsù kwebe.

Nwènù balumyana ne bàna beetu, itabaayiku ngààkulè neenu mudilekelele bwa nkambwa Davidi ne, yèyè mmufwe ne mujiikiibwe, ne majambu ende àdì munkaci mwetu emu too ne lelu ewu.

Ki bwa cinyi bu mùvwàye muprofeta, ne mumanye ne Nzambi ùvwa mudicipe kùdiye ne mucipu ne, mùwàna wa munda mwende, bilondeshile mubidi, yèyè ùvwa mwa kjuula Kilisto bwa kusòmbayè pa nkwasà wende wa butumbi,

Yèyè mwikàle ùdyànjila kumona cyôci eci ki yèyè kwakula bwa dibiishibwa dya Kilisto ku lufu, wàmba ne musuuka wende kawuwwa mulekela mu iferno to, anyi mubidi wende kawuwwa mwa kumona dibola nansha.

¹⁰ Twinyikàayi mitu yetu anu bwa katanci kakese cyanààna bwa disambila.

¹¹ Taatù wetu wa mu Dyulu, tudi ne kusakidila Kùdi bwa luse. Ne ncya bushuwa, Mukalenge, ki bwalu kaayi tudi kaaba aka diloolo edi, mbwà kulomba luse. Katùvwakù bafwanyine kulomba cyôci eci bu ne katùvwa ne diitabuuja dya kwitabuuja ne ncifwanyine kutupeebwa to. Bantu mbabwele mintùta ne mintùta eku ne eku mu ditunga dijima, ne masambila ki kubàndawù myaba yònsò eku, àlwa Kùdi, bwa myoyi ya aba batùdi munkaci mwa kulombela bafwilekù diloolo edi aba yilamiibweku. Mukalenge, tudi baswe kulombaku makanda bwa baamaamù ne baataatù bàà miine nsongà eyi.

¹² Nenu bilondeshile mutùdi tuumvwa bàmba ne, nsongààlùmè ewu wākùdimunu mwoyi wende ne wāvūtàngiji Kùdi ne mmuswe kuKukwacila mudimu. Kabidi mutùmvù umwe wa ku baakudi wàmba, ne, mmuswe kushààla mwambi wa Evanjeeliyo, ndi ndomba, Nzambi, bwa Wèwè kufilaku mpungà ewu kùdi nsongààlùmè awu.

¹³ Tùfwilèku luse ku mpekaatu yetu, kezulaku myoyi yetu ku meeji mabi, ne cyònsò cidi cifwanyine kwikala mu njila wetu cidi cifwanyine kupangisha disambila dyetu bwa kwandamunyiibwadi bwa bantu aba aci.

¹⁴ Bu mutwabadi Dìyi Dyebe, tudi bamanye ne dyulu ne buloba byònsò bibidi nebijimine kadi Dìyi Dyebe kadyakupangilaku to. Tudi tulomba bwa Wèwè kutasakidilaku, ku Nyuma Mwimpè, dyumvwija didi difwanyine kwangata, didi difwanyine kwikala diswa Dyebe dya Nzambi mu cilumbù eci mpindyewu, bu mutùmvù mubalumbulwidi ne bààbùngi bàmba. Nenu tudi tulomba bwa twâpetakù anu cya dyenza pashiishe, cidi cikèngelà bwa twètù kwenza pashiishe. Mukalenge, tudi kaaba aka mbwà kucyenza. Tùmanyishèku cyôci aci, Mukalenge, ku Dìyi Dyebe. Bwalu tudi tulomba nunku mu Dìnà dya Mwan'Ebe, Mukalenge Yesu. Amen.

¹⁵ Mu kubala kwa mvensa mikese eyi, ndi mfika ku dyumvwa ne bùdi panshi ebu mbunene, bwalu ki bwalu bwine bùdi butondè. Mvwa mudyāmbidile mundamunda, pāngūmvù ne mēmè kupeta mukenji wa ku nshinga wa maamù awu awu ne: “Kadi bu ne ùvwa mmwanàanyi mēmè wa balume, anyi wa

bakaji musòmbè mu mulongo wa lufu awu?” Nenku ndi... Tudi baswe kucitwa nyama ku mikolo mu mushindu wònsò wutùdi naawu.

¹⁶ Dìbà adi bamwe mbafwanyine kwamba ne: “Ee, aku’s kàvwa anu katupa kakese menemene kàà Dìyì, kawabadi aku, Mwaneetu Branham.” Ee, aci kabidi, cìdi mwa kwikala cilelela. Kadi, nudi numona’s, cìdi ne bwalu kí—kí mbunene, anyi búngì bwa mèyì to. Cìdi ne bwalu ncìdici cyumvwija. Cìdi—cìdi anu... Cìdici, mmulayi wa Nzambi.

¹⁷ Nenku ndi muswe kupatula mu cyòcì eci diloolo edi, mu cyena-bwalu eci diloolo edi, anyi kupatula mu cyòcì eci cyena-bwalu cya ne: *Cyeyemenu*.

¹⁸ Ndi musungule cyena-bwalu eci, kùkaadi mutanci kampanda, pàmvwà musòmbè mu cibambalu cyanyi cya cilààla-beenyi, bwalu ndi ngeela meeji ne patùdi twakulangana apa bìdi bitukengela cintu kampanda cya bushuwa, cyeyemenu kampanda kutùdi mwa kwikala bakwate ne bamanye ne ncilelela. Mu dìbà dya ntàpè-nkutàpè bu dyòdi edi, tudi ne cya kwikala ne cintu kampanda citùdiku batwishii bwe, ciikàle cilelela, cintu kampanda kutùdi mwa kwikala bakwate, bwa kumanya ne, mmushindu kaayi wàpitakanà cilumbù aci.

¹⁹ Mpindyewu, bi—bilondeshile Webster, *cyeyemenu*, mu cyòcì ciine, cìdi “kaciyi ne mikàlù mu bukole bwàci,” ne anu ku cibangidilu mene cidi “nkàmisha” kampanda. Kadi *nkamisha* pende ùdi ng’“amen.” Ncyeyemenu. Bu mùdi cìdici... Ki ndekeelu nyèyè awu. Ki byònsò mbyòbì abi.

²⁰ Mpindyewu, cyenzedi cinène cyònsò cya bulobo cìikaadiku pa buloba apa, citu ciswikiibwe ku cyeyemenu cya mushindu kampanda. Kwênàku mwa kwenza cintu nansha cimwe pàdiku kakùyi cintu kampanda kùdi mwa kwikala mukwate nansha.

²¹ Pàdi nsongààlùmè ukeba bwa kusela nsongààkàjì, ùdi ne cya kumanya ngiikadilu wa nsongààkàjì ewu. Anyi nsongààkàjì ùdi ne cya kumanya ngiikadilu wa nsongààlùmè, cintu kampanda kùdiyèkù mwa kwikala mukwate. “Mulume ewu neikalè mulume wa maalu malulame anyi? Neikalèku bayaanyi wa mushindu mujaalame bwanyi mèmè anyi?” “Mukaji ewu, mu nsòmbèlu, neampeeshe cìndi mèmè—cìndi mèmè mwindile kùdiye anyi, lulamatu ne bikwabo?” Ne pashiishe bìdi bikengela kwikalèku mwaba kampanda wùdibo mwa kushindamijila micipu yabo—yabo, biikàle bamanye ne kùdikù cintu kampanda cyàshààlà cikwate. Nenku ki bwa cinyi tutu tulwa naabo ku ekeleeziya, ne ku Dìyì dya Nzambi, bwa kuswikisha ciine cyeyemenu eci.

²² Mpindyewu, Pòlò kaaba aka, bu mutùdi bamone, ùvwakù ne cyeyemenu kampanda kwàkashààlàye mukwate, matuku ende ónsò a mwoyì, paanyima pàà dikudimuna dyende dya mucima, ciwva: nsòmbèlu mushindameene pa Kilisto! Nenku

mmwaba kaayi ewu wùdì wùkèngelà kuteekelapu cyeyemenu's we: nsòmbelu mushindameene pa Kilisto! Ûvwa nnsòmbelu mushiilangane ne uvwayè nende musangu kampanda awu, bwalu wàkamba ne: "Nsòmbelu ûndì nende mpindyewu ewu," uvwa mushiilangane ne uvwayè nende kwònsò aku awu.

²³ Nenku kwakalwa cikondo cyàkenzà Pòlò dilabula edi òvwa dimufikishe ku diine dipangadika edi. Bwalu, Pòlò òvwa muntu munene, wa bukole munkaci mwa beena Yuda, ne mwena—mwena teoloji munene, kadi kàvwa mutwishibwe menemene bwa kaaba kavwaye mwimanyine aku to. Kadi òngà dituku, mu njila mutangile ku Damàsekè, Bukènkè kampanda, Dikunji dya Kapyà, dyakapweka difumine mu Dyulu. Nenku Pòlò, bu mùvwaye mwena Yuda, òvwa mumanye ne Bukènkè ebu, Dikunji dya Kapyà, òvwa n'Cintu ciine, Nzambi mwine wàkapàtula cisàmbà cyabo mu Ejiipitu awu. Bàvwa balonde dyòdì Dikunji dya Kapyà edi. Nenku, bu mùvwaye mwena Yuda, kuMwambilaye, ne lukasa lwònsò ne: "Mukalenge, Wèwè udi Nganyi?" Ûvwa muMumanye bu "Mukalenge," kadi: "Wèwè udi Nganyi?"

²⁴ Ki Dìyì kwalukila difùmina mu Dikunji dya Kapyà amu ne: "Mémè Ndi Yesu, ne mbikole bwa wèwè kukandamana cyanààna." Kubangila anu piine apu, Pòlò wàkamanya ne Yehowah wa Dipungila Dikulukulu òvwa n'Yesu Kilisto wa Dipyadipya. Ki kupetaye cintu kampanda kùvwaye mwa kwikala mukwate, ne mushindu awu ki wàkafikàye ku difunda dya Mukanda munene wa Ebelu awu.

²⁵ Mpindyewu, wèwè, mu webè nsòmbelu wèwè ne cyeyemenu kampanda, udi wenza bintu byùdì kùyìkù mufwanyine kwenza pa ciibidilu to, nangananga wèwè ne nsòmbelu mushindameene pa Nzambi. Nsòmbelu wa mushindameene pa Nzambi awu ùdì wènzeja muntu bintu bidìye kàyìkù mufwanyine kwenza pa ciibidilu to; wa pabwende menemene, wa maalu mapangakane. Nsòmbelu wa bwena Kilisto ngwa pabwende ne wa maalu mapangakane nanku bwa cinyi? Mbwalu yèyè mmutangile ku Dìyì dya Nzambi, cidì cyambe kwikala cyenyi ku maalu a pa buloba leelu ewu.

²⁶ Mpindyewu, tudi ne maekeleeziya, ne tudi ne malongolodi, ne tudi ne ntendeleelu, kaa, byònsò abi ntùnda ne ngenene, buloba bujima.

²⁷ Mu misangu yanyi mwandamutekete yìndì munyungulukepu ayi, kubangila anu kacya pàmvwà neenu muneemu mu Houston emu apu, ndi mwambakaje dimanya dyàbùngì pa tunzambi ne ntendeleelu ya pa buloba ebu. Kadi cìndì ngamba kì ng'aci to.

²⁸ Ndi mémè ngaakula bwa cyeyemenu, muswikakaja ne Kilisto. Dìbà adi, cidì cikuvwija muntu wa—wa pabwende. Wèwè udi wenza bintu bya pabwàbi. Ngeelèlù webè wa meeji mmushiilangane anu menemene ne ngeelèlù wa meeji òvwa

nende kale wawa, bwalu wâpeci cintu kampanda, mu mushindu wa ne wedi lwongò lwa diitabuuja mu Kampanda wâkafûka dyulu ne buloba awu, mu mushindu wa ne, Dîyì Dyende Dyôdi diine ndifuki, Nzambi mwine wâkamba dîyì buloba kwikalabuku awu, ne udi cintu nansha cimwe kaciyikù mwa kuMukolela awu. Pa nanku cìdi cikuvwija mufuki, wêwè mwine awu, bwalu udi wangata Mèyì Ende. Ne dîyì mmeeji mapatwila patooke.

²⁹ Mpindyewu, Pòlò ùkaavwa mukafike mu ngiikadilu awu, mùvwàye kàyi ne—kàyi anu ne dilabula dya cyena-teoloji, dya ditupu to, kadi yèyè wâkapeta bujaadiki bwende bwa nkàâyendè. Yèyè ùvwa mutuutakeene ne Nzambi, ne kumanyaye ne wâkabîkidiibwa kùdi Nzambi. Ne—ne kabyakakengela bwa muntu nansha umwe amwambile nî ncinyi nî ncinyi pa bwalu abu to. Ùvwa mutwishiibwe bya kakùyi mpatà to ne Nzambi ùvwa mushàale anu Nzambi. Bu bàà pa buloba mwa kwenzaku anu nanku awu's we!

³⁰ Nenku bu cisumbu eci diloolo edi, bàdi basòmbe apa aba, bìikalakù mwa kuvuluka ne Nzambi ùcidi anu Nzambi's we! Yèyè ùdi ne bukole bwa kwandamuna mu cilumbù eci anu mùdiYe mwa kwandamuna mu bwalu bwa dyondopa dya kùdi Nzambi anyi mu cintu cikwabo kanà cyònsò. Yèyè ùcidi anu Nzambi. Nenku bu twètù mwa kwibakila ditekemena dyetu, kî ng'anu ditekemena dyetu nkààyaadi to, kadi meeji a—a bushuwa aa, pa cìdiYe wàmba! Ne twètù tudi bamanye ne Cìdi Bulelela.

³¹ Kadi bantu bàdi bènza maalu mu mushindu wa pabwàwù. Bìdi bimweka anu bu ne bàdi bapwa mwoyi luseke lubi bwalu bààpeci cyeyemenu kampanda, bwalu n'Dîyì dya Nzambi. Yesu wâkamba ne: “Maulu ne buloba nebijimine, kadi Dîyì Dyanyi kadyakupangilaku to.” Pa nanku twètù biikàle ne Dîyì dya mulayi, dîbà adi kakwena bya ne neDipangile abi to. KaDyena mwa kupangilaku to.

³² Pa nanku mêmè—mêmè ndi ngiitabuuja ne, ki kiipacila kaa masangisha a milombo mwab'ewu, kùdi batendeleedi bàà—bàà mu Houston, cìdi cibatwe ku mwoyi, myoyi ya bantu. Ne ki citùdi badikungwijile kaaba aka ncyôci aci, mbwà—mbwà kusoka bukole bùdi butambe kule ne kule mikenji yònsò ne makole bikwàtakaja kùdi bantu abi, cintu kampanda, Udi mwa kushintulula myoyi ya bantu, bu mwakenzaYe Pâlò mu Ejiipitu amu. Ne Yèyè udi—Yèyè udi Nzambi. Ne twètù tudi ne cya kulekela mpindyewu kwikala kutangila ku—ku luseke lubi, kadi twikalè tutangila luseke lwîmpè.

³³ Ne kumpala kwa wêwè kupeta mushindu wa kwikala ne diitabuuja, bìdi bikengela wìkalè ne cintu kampanda cya kwikadilamu ne diine diitabuuja adi. Nenku mmu cinyi cikwabo mùdiku mwa kuteekela dyeyemena dya diitabuuja kutamba mu Dîyì dya Nzambi udi ne mwoyi, cìdi cifuke, makole a Wa

bukole bwônsò awu? Mmu cinyi cikwabo mutùdiku bafwanyine kuteeka ditekemena dyetu? Ki bwa cinyi cidi cikufikisha ku dimweneka mushiilangane, ku dya maalu mushindu mushiilangane. Wèwè udi ukeba bwa Nzambi ùjè mulayi Wende. Nenku pàdì ntatu yijuuka, bu mutùdì naayi mpindyewu emu, Dyôdì didi lwongò. Dìdì cintu kampana cidi—cidi cikukwate, cintu kampana kùdì muswikiibwe. Dìdì mulayi kutùkaadì baswikiibwe, ki cidi Dîyì dya Nzambi.

³⁴ Anu mùdì lwongò lwikàle cyeyemenu bwa mazuwa a màyi, mu dîbà dya cipeepele cikole cya mvula. Mazuwa adi mwa kwikala enda aya pa mbû. Lwongò lùdì lusanganyiibwa kumpala kwa mazuwa aku. Lùdì . . . Ndwikishe. Nwènu bàà muneemu mu Houston, bàdì pabwîpì menemene ne mbû aba, nutu numona pàdì mazuwa abwela apu.

³⁵ Bwa cinyi kwambula bujitu bupitepité bûngì bwa lwongò lwa bukole bwa menemene elu? Kadi, nudi numona's, pàdì bipeepele bikole bya mvula bilwa, bipeepele bikole bya mvula bya—bya bìvuma bìdì bìpanda màyi a mbû abi, ne bifwanyine kukùpa mazuwa awu buludi ku cibùngùbùngù mu mwaba kampana, ne kuàtuutakù, anyi kuàkùdimikila mu màyi àdì kaàyi ne ndondo amu; àdì apatuka akabwela mu màyi a ndondo mule amu, nenku àlekelela lwongò lunene, lunènaanènààlè alu, lùdì luswikiibwe mu mushindu wa ne nelwikalè lwenda ludikoka panshi pàà màyi a mbû apu too ne mwalwalu kupayika ndobo walù awu mu mukuna kampana wa kawùyi wumweneka to. Dîbà adi bipeepèlè bikole bya mvula abi bìvumè pìikalàbi biswe kuvuma's; mazuwa awu àkaadi mamane kupeta cyeyemenu. Lwongò lùdì lùkawkàta mwaba kampana mwamwa naka, kadi—kadi mmaswika bikole. Nenku pàdì mazuwa awu ne mavwala atuuta mu nyungulukilu wa mazuwa, ôwò adi ne cyeyemenu, bwalu mmaswika.

³⁶ Nenku mushindu awu ki wùdì muntu pàdiye muswikila kùdì Kilisto ne ku Dîyì Dyende, ne ùDìitabuuja. Kùdì cyeyemenu kampana kuntwaku, cintu kampana cidi cìmukwàta.

³⁷ Cyeyemenu cidi bu mutooto wa ku nord paùdì mujimine. Paùdì—paùdì mujimije dileeja dyebe dya njila, ne muswe kupeta njila webe wa dyalukidila, mutooto wa ku nord ncyeyemenu. Mpindyewu, kùdì mitooto mikwabo, kadi yitu yôyi yinyunguluka pamwe ne buloba. Pàdì buloba buyinyunguluka apu, kùdì . . . bùi bonyunguluka buseemena kule naayi. Kadi bwa . . . Nudi bamanye's, mutooto wumwewumwe wa mu dinda awu ngwôwò mutooto wa diloolo kabidi, bwalu buloba budi anu bonyunguluke cyanààna. Kadi kùdì mutooto wumwepele wùdì kawùyi wunyungaku to, ne wôwò mmujalamijila anu pankaci menemene pàà buloba. Nenku ki bwa cinyi . . . Wôwò ki—wôwò ki mutooto wa cya bushuwa. Wèwè mumanye mutooto wa ku nord, udi misangu yônsò anu mwa kupetulula njila wa diyila. Kadi,

kaa, apu mpàdì muntu mujimine, ne kàyi anu mumanye njila wa diyila to.

³⁸ Mpindyewu, mèmè ntu mumanyeku Mutooto kampanda. Kaa, Wòwò awu mmutambe mutooto wa ku nord. Ne bwa kwikala muswikiibwe ne kumona Bwikadi Bwende, nansha wèwè mujimine mushindu kaayi anyi mwikàle usanganyiibwa mwaba kaayi, udi mwa kupeta njila webe wa dyalukidila ku bulombodi Bwende, mbwena kwamba ne n'Diyi Dyende. Didi njila wa dipatukila mu ntatu yònsò. Didi njila wa ku ditalala. Didi njila wa ku dyakalenga. Didi njila wa ku Mwoyi, yèyè mwine awu, nkulonda kwa Mutooto ewu, Mukalenge Yesu. Neku mpindyewu, wèwè muswikiibwe ku Mutooto awu, Nyuma Mwîmpè ngudi Kaleeji-nord kùkalà mwa kufunkuna anu ku Mutooto awu. Nyuma Mwîmpè. . .

³⁹ Kaleeji-nord, kàtu kàkòkiibwa bikole kùdì pòle nord awu. Neku mushindu wumwepele, diitu dyùdì usanganyiibwamu nansha diikàle dya mushindu kaayi, anyi nansha bikùtùkùtù bya mici ne bisuku bikujibikile mushindu kaayi mu nyungulukilu webe, anyi nansha pa mbû piikàle mafwima a bishi, kalonda kàà kaleeji-nord aku, udi mwa kukanyungulula kukatuma luseke lwònsò lùdì muswe, kadi nekàalukilè lubilu ne nekafunkune anu ku mutooto wa ku nord.

⁴⁰ Neku patùdì tusanganyiibwa mu lutatu, kadi beeyemene Kilisto, kùdì cintu cimwepele cya bushuwa: Nyuma Mwîmpè neatufunkwine ku Dìyi dũkalà mwa kutulombola too ne kùdì Mutooto wa ku Nord, ne kutusungila ku byònsò bitùdì naabi dijinga abi. Yèyè ùdì Cyeyemenu cyetu.

⁴¹ Bwa muntu udi mujimine mu cipeela, kaleeji-nord ki cintu cidì cimulombola too ne pambelu. Patùdì tusanganyiibwa mu lutatu, kùdì cintu anu cimwepele; ncyà bushuwa anu mùdì mutooto wa ku nord amu. Pàdì anu buloba busanganyiibwa mu kaaba kààbù, ne bunyunguluka, mutooto wa ku nord wòwò newushaale mu kaaba kààwù.

⁴² Ne pàdìbi anu ne Cyendelele cidikù, Kilisto neikalè kashidi anu Musungidi, ne njila wa dipatukila mu bwalu butonde bwònsò, kantu ne kantu kònsò kàdì kàtâpululangana, diteeta dyònsò, bintu byònsò. Ne ki bwa cinyi twètù—twètù, patùdì baswikila kùdìYe, katwenaku tupeta dilubakana ne basalukangane mùdì bàà pa buloba bènza amu to: “Neku, kaa, netwènzè cinyi bwa *cikampanda*? Netwènzè cinyi bwa *cikansanga*?” Tudi benze anu bu ne katwenaku beele lwongò to. Kadi muntu udi mwele lwongò lwa musuuka wende mu Kilisto Yesu, dyeyemena dyende mwòmò amu, mumanye ne pàdiye ulomba Taatù cintu kanà cyònsò mu Dìna Dyende, “Yesu mmwambe ne: ‘Mèmè nèncyènzè.’” Aci’s ncikose bwalu.

⁴³ Aci—aci ncikose bwalu. Ng’amen. Ncyeyemenu. Nnkàmisha. Pàakambà Yesu ne: “Nulombe Taatù cintu kanà cyònsò mu

Dinà Dyanyi, Mémè nêncifilè,” mpindyewu, aci’s nnkàmisha’s. Kwajiki’s. “Cyònsò cinùdì naaci dijinga, panùdì nusambila, nwitabuuje ne nudi nucipeta, nenucipete.” Aci’s ncikose bwalu. Ki cyònsò cidiku, nwamonu’s, patùdì bulelela beele lwongò ne baCītàbùùje, ne baMuvwije Cyeyemenu cyetu. Bwalu, Yèyè udi wenza. Yèyè n’Cyeyemenu cidi cituumusha ku bwôwà bwònsò. Kakwenaku bwôwà to pàùdì bulelela muswikila ku Lubwebwe lwa Bikondo.

⁴⁴ Kakwenaku bwôwà to bwa mwendeshi wa mazuwa a mâyi, nansha mazuwa matuuta kùdì mavwala bishi, pàdì anu lwongò alu kacya lwakwata ku lusongo lwa mukuna awu mwamwa naka. Mona’s, bushuwa. Yèyè mmumanye ne mazuwa awu neikalè mwa kushààla malèlème. Kaàkuya kadikùma ku dibwe kampanda mu mwaba kampanda to. Kaàkuya kabwela mu mâyi kampanda a kaàyi ne ndondo bwa kukudimanawu to, bwalu àdi ne cyeyemenu cyelè lwongò mu lusongo lwa mukuna kampanda.

⁴⁵ Nunku pàdì muntu mwa kusambila disambila dya diitabuuja, ne kwela lwongò lwa musuuka wende mu Dìyì dya Nzambi mwamwa, mùdibi ne, “maulu ònsò ne buloba nebijimine, kadi Dìyì adi kadyena mwa kujimina to,” kakwena bwôwà nansha bukesa to. Bòbò bàlwe, bãmbè cyònsò cyaswabo kwamba aci. Diitabuuja dyetu didi mu Nzambi, Nzambi nkàâyendè. Tudi tucitabuuja.

⁴⁶ Kùvwa cikondo civwà mishindu ya ndiilu wa ku meesa miikàle mishindameene pa dìyì dya mukaji kampanda. Ngeela meeji ne dinà dyende divwa dibiikidibwa ne Emily Post. Mpindyewu, yèyè nguvwa cyeyemenu bwa mishindu ya ndiilu wa ku meesa. Emily Post yèyè mwambe ne: “Angataayi nkunde yenu nuyidye ne keele,” ki civwàku. Hmm. Ki civwàku, bwalu yèyè nguvwa cyeyemenu bwa mishindu ya ndiilu wa ku meesa. Yèyè mwamba ne: “Ikalaayi nunwina kàfè keenu mu kàlòngò kàà ditèekela kakopo, ne nukàpwita panùvwà nunwa apu,” nansha cyòci cimwèka cya bukooya bishi, civwa anu cyeyemenu. Muntu yònsò ùvwa ùcituucila mutu ku dikoshi bwalu bàvwà bàmwangata yèyè bu cyeyemenu bwa mishindu ya ndiilu wa ku meesa.

⁴⁷ Bidi bikengela bwa twètù kwikala ne cyeyemenu nansha bitùdì twenza biikàle binganyi. Piikalàbi ne netwikalèku mwa kukumbaja cintu kampanda, bidi bikengela bwa twikalèku ne cyeyemenu.

⁴⁸ Kùvwakù cikondo kampanda civwà dìyì dya Hitler diikàle cyeyemenu mu Allemagne. Civwà kampanda mukwabo mwambe nansha ciikàle cinyi, dìyì dya Hitler ki divwà cyeyemenu. Yèyè mwambe ne: “Bàfwè,” bàdi bàfwa. Yèyè mwambe ne: “Biiikalè ne mwoyi,” bàdi bàshààla ne mwoyi. Ne yèyè mwambe ne: “Tuyààya ku mvita,” anyi ne: “Katwena tuya ku mvita,” cyònsò citùdì twenza aci, dìyì dyende ndivwà cyeyemenu.

49 Kùvwakù cikondo kampana cìvwà Italie mwikàle ne cyeyemenu. Cìvwà ndiyi dya mfumu wabo wa cimbàmbilà awu, Mussolini, cìvwàye yèyè wàmba bwa kwenza aci. Bàvwà bàmba ne kanyeemesha wende wàkafika ne mashinyi, kasunsa kamwe kumpala kwa dîbà, bwa kumwangata. Kumwasaye cingoma. Bwa cinyi? Yèyè ùvwà mwambe ne: “Mémè ncyèna muswe bwa wèwè kufika apa kasunsa kamwe kumpala kwa dîbà to. Ndi muswe bwa ufike apa pa dîbà jaajaaja, dîbà pa dyòdi.” Nwamonu anyi? Dìyi dyende yèyè ki divwà cyeyemenu. Italie mujima ùvwà ùcituucila mutu ku dikoshi.

50 Kùvwakù cikondo kampana cìvwà Pâlò, mu Ejiipitu, mwikàle cyeyemenu. Kadi nudi numona. . .

51 Kadi mapangadika ònsò àvwàbo bangate aa àvwà mmangadika menza kùdi bantu, ne ònsò awu akapangila. Bwa cinyi? Bwalu kaàvwà makumbanangane ne buntu. . . kaàvwà makumbanangane ne Dìyi dya Nzambi bwa nsòmbelu wa bantu to. Mémè ndi muswe aci, mùndi ntekemena, bwa cyèlè lwongò. Twètù baswe bwa kusungilaku mwoyi wa bantu, bidi bikengela bwa tülwe bakumbanangane ne Dìyi dya Nzambi ne ndongamu wa Nzambi bwa mwoyi wa bantu. Nenku, mushindu wumwepele wuwikalàku mwa kupeta cyòci eci, ngwà kucipetela mu Dìyi Dyende, ne kuciitabuujà, mpindyewu.

52 Pa nanku, ba-Pâlò abu. Mémè mvwa mu Ejiipitu anu abidi àdi panshi aa, ne ngeela meeji ne bivwa bikengela bwa kuumbulabo too ne mu mètres asambombo mwinshi mwa buloba, bwa kupetabo mwine—mwine mwaba wùvwà Pâlò musòmbè bu mfumu wa buloba awu.

53 Ne ba-Helòòdè banene abu, ne bakwabo, patùdi tupita twenda tulonda mulongo awu, tudi tumona myaba yidi makalenge abo awu madishindile ne maye.

54 Kadi kùdi Bukalenge bumwepele bùdi kumutu kwa makalenge ònsò. Mbutumbuke menemene mu maulu mu mushindu wa ne kabwadyakujiminaku to. Ne Mwòmò amu mmùdi Mfumu kampana musòmbè, mu mushindu wa ne, pàdiYe wàngata Dyende dipangadika pa bwalu kanà bwònsò, ne twètù twitabuujà dipangadika adi, aci ncyeyemenu. Nebiikalè mushindu awu nansha cidi ní nganyi ní nganyi mukwabo wàmba pa bwalu abu. Ki mùdibi misangu yònsò nanku.

55 Mpindyewu, Tubàdi twètù Tutùmbùke. Tubàdi twètù Tutùmbùke, tùdi—tùdi ncyeyemenu, ndekeelu wa bilumbù byònsò. Mpindyewu, bidi bikengela bwa twikalè naatu. Misangu mikwabo twètù tudi bafwanyine kubenga kwitaba dipangadika dyatu. Bu mùdibi ne, bòbò kabavwà biitaba dya Hitler to, ne bikwabo. Kadi nansha nanku bìdi bikengela bwa twikalè ne cyeyemenu eci. Nenku cyeyemenu cya ditunga ne cya bilumbù n’Tubàdi Tutùmbùke. Tubàdi twètù twa pa kaaba tùdi mwa kulumbulwisha cintu kanà cyònsò ne kwamba *cikampanda*,

kadi Tubàdi Tutùmbùke tùdi ne bukookeshi pa twònsò atu. Twètù tudi ne cya kwikala naatu. Twètù bu ditunga, tudi ne cya kwitaba dipangadika dyatu, bwalu ditunga ndiswikiibwe ku cyeyemenu cya Tubàdi Tutùmbùke eci. Eyo.

Cintu cyònsò cìdi ne cya kwikala ne cyeyemenu.

⁵⁶ Nutukù bamanye ne dinaya dyetu dya ndundu dya ciibidilu edi bitu bikengela kwikaladi ne cyeyemenu anyi? Eyowa's. Cyeyemenu mu dinaya dya ndundu ncinyi? Mwedi wa kashiba. Kadi bu ne kakwenaku mwedi wa kashiba to, nwamonu's, mwedi wa kashiba? Nansha wèwè mwimanyine lwà penyi, mwaba wònsò wùdi utangidila wamba ne: "Cìvwa nndundu," kadi yèyè mwambe ne: "Cìvwa ndituuta dya ndundu," ee, ki civwàku, civwa ndituuta dya ndundu. Bwa cinyi? Bwalu, dîyi dyende yèyè, cìdi babandidi bambe, cìdi muntu mukwabo kampanda mwambe nansha ciikàle cinyi. Cìdi ndituuta dya ndundu bwalu yèyè wàcìbìikidi ne ndituuta dya ndundu, ne yèyè ngudi mwedi wa kashiba. Mpindyewu, kadi bu ne kakùvwakù mwedi wa kashiba? Nkufwanyine kwenzeka makokyanganyi a menemene, ne byònsò mu cimvundu cinène, mu mushindu wa kanùyikù bafwanyine kwikala ne dinaya diine dya ndundu adi to. Ki bwa cinyi, bikengela nwikalèku ne cyeyemenu kampanda, bwa kwikala ne dinaya dya ndundu. Bidi ne cya kwikala mushindu awu.

⁵⁷ Mpindyewu, kùdi ne cya kwikala cyeyemenu, mu midilu ya ku njila. Midilu ya ku njila nyitù cyeyemenu's we, eyowa's, bwa mashinyi àdi àsanganyiibwà mu njila aa. Kadi bu ne kakùvwakù midilu ya ku njila? Anyi, bu ne midilu ya ku njila ya mashinyi ayi mmijime, peebe mwikàle wenda upweka lubilu mu mùsèèsù? Ne muntu kampanda ùlwa mu *nunku*, wàmba ne: "Mpindyewu, mèmè ngukàävwa wa kumpala kaaba aka. Mèmè ngudi ne cya kupita mwaba awu." Kadi ewu wàmba ne: "Mèmè dîbà dikaadi dimpite bwa kuya ku mudimu." Nwènù bàdi bàmba bwa dipàtakaja dya njila kùdi mashinyi, s'nudi bafwanyine kudipeta anu cya bushuwa. Kadi, nwamonu's, midilu ya ku njila nyidì yikosa bwalu. Yòyi ki cyeyemenu. Mudilu wòwò wa màyi a matamba, nda. Wòwò mukunze, imana. Kwòkù kakùyì cintu pààci ne—ne mmidilu ya ku njila ya mashinyi to, dîbà adi tudi bafwanyine kupeta dipàtakaja dya njila kùdi mashinyi.

⁵⁸ Nenku ki lutatu lùdiku mu diitabuuja dya bwena Kilisto leelu ewu ndwòlù alu. Tudi ne dipàtakaja dya njila kùdi mashinyi búngi cyanàànà, bantu bònsò bàdyènzela cyeyemenu cyabo bòbò biine.

⁵⁹ Pààbì, tudi ne Cyeyemenu cimwepele, ne ciine aci n'Dîyi dya Nzambi udi ne mwoyi. Aci ncidi cikosa bwalu kashidi, cìdi nì nganyi nì nganyi mukwabo wàmba nansha ciikàle cinyi.

⁶⁰ Bikaadi byambe kufika too ne kaaba kafwanangane ne kàvwàbi mu matuku a Balumbulwishi, muntu ne muntu

mwikàle ne cyeyemenu cyende sungasunga. Kadi byònsò abi bìdi bipangila, bu ba-Pàlo ne bakwabo abu.

⁶¹ Kadi Cyeyemenu cya Nzambi n’Dìyì Dyende. Yèyè udi uDifila ne: “Nenku maułu ne buloba nebijimine, kadi Dyòdi kadyadyakujiminaku to.” Mémè ntu munange aci.

⁶² Mpindyewu, katwena ne díbà dyàbùngì to, pa nanku mu tusunsa tukese cyanàànà twǎnjì tütangilààyikù bamwe bantu bàakabwelà mu lukòta, ne bikondo bìvwà lufu luseemene pabwìpi, bu mutùdi twètu tusanganyibwa diloolo edi emu, ne bàakangatà cyeyemenu kampanda. Twǎnjààyi kuyiikilaku ne bamwe bàà kùdibo.

⁶³ Twǎnjààyi kwalukila ku bwalu bulonda kampanda bwa kale butùdi bònsò bamanye bìmpè, mu matuku àvwà mpekaatu muungwile mushiki pa buloba mu mushindu wa ne byakenda Nzambi ku mwoyi ne biMutonde, ne buloba bìvwà ne cya kubutudiibwa. Nenku Nzambi kupeeshaYe Noa cyeyemenu, ciine aci cìvwa n’Dìyì Dyende. Nenku, nansha nanku, cyeyemenu aci cìvwa mbwà kusungila bantu. Noa wàkamanya ne bàà pa buloba bàvwa ne cya kufwa. Nenku Nzambi kumupeshaYe cyeyemenu, ne ciine aci cìvwa n’Dìyì Dyende, mpindyewu, bwa kusungila bantu Bende ku lufu. Mpindyewu, cyeyemenu cìvwa ncinyi, bwa kusungila bantu ku lufu mu cikondo cya Noa? Cìvwa n’Dìyì dya Nzambi. Ki cìvwa cyeyemenu, cìvwa ní nganyi ní nganyi mukwabo wàmba nansha ciikàle cinyi.

⁶⁴ Cìvwa maalú a mamanya mambe ne: “Kakwena mvula nansha wa kànà muulu mwamwa to. Tudi mwa kutuma byamu byetu ku ngondo. Kakwena mvula muntu mwamwa to. Mvula neikalè mwa kulwa panshi apa bishi’s?” Nzambi Yèyè mwambe ne mvula nealoke, Nzambi udi mwa kuteeka mvula mu maułu, pìikalàbi ne Yèyè ngudi mwambe nanku.

⁶⁵ Noa kuditwaye buludi mu mudimu wende, mudilekelele, ne mwikàle ulongolola bwàtù bwa disungidiibwa dya bantu. Bwalu, kùvwa cyeyemenu kampanda cìvwa cipeeshibwe kùdi bantu, bwa baamona mwa kusungidiibwa bu bòbò mwa kulonda njila wa Nzambi mulongolola bwa ciine cyeyemenu eci.

⁶⁶ Pa nanku, pashiishe, misangu mikwabo, patùkaadi bamane kwitabuuja cyeyemenu . . . Ndi muswe kwamba eci bwa baledi bàà bàna aba, bwa cìndi muswe kunwambila mu katanci kakese cyanàànà emu. Mpindyewu, pìikalàbi ne . . .

⁶⁷ Misangu mikwabo, patùkaadi bacitàbe, tudi twediibwa ku diteeta, bwa kumona ní tudi baCìtàbùùje bulelela. Tudi—tudi . . . Aci ki citù Nzambi wenza pa ciibidilu. Ne Nzambi ùtu ukwata mudimu . . .

⁶⁸ Yèyè kèna mwa kushintulula ndongamu Wende nansha, bwalu Dìyì Dyende ki Yèyè mwine. “Ku cibangidilu kwakadi Dìyì, ne Dìyì dyakadi ne Nzambi, ne Dìyì dyakadi Nzambi. Ne Dìyì dyakawjiibwa mubidi ne dyàkasòmbela munkaci mwetu.

Umwèumwè awu makeelela, leelu, too ne kashidi.” Pa nanku, cidi anu Nzambi misangu yònsò.

⁶⁹ PàdìYe ubiikidiibwa bwa kumata mu cyalu, bwa kwenzaYe myanda, ne dipangadika didiYe wàngata, bùdìYe naabu mbwà kushààla misangu yònsò anu ne dipangidika adi. Kêna mwa kudishintulula to, bwalu Yèyè kàtu ne mikàlù to.

⁷⁰ Mpindyewu, mèmè ndi mwa kushintulula dipangadika dyanyi, wèwè udi mwa kushintulula, bwalu twètù tudi ne mikàlù. Ki bwa cinyi, tudi twenza bilema.

⁷¹ Kadi Nzambi Yèyè kêna mwa kushintulula Dyende dipangadika to, bwalu Yèyè kàtu ne mikàlù to, ne Dyende—Dyende dipangadika ndipwangane, misangu yònsò. Yèyè kêna mwa kwamba ne: “Mvwa mutupakane *apa*, nenku Nènshintululè dipangadika Dyanyi” to, bwalu aci ncifwanyine kuleeja ne Nzambi mmufwanyine kushintuluka. Nenku Nzambi kêna mwa kushintuluka to, anyi Dîyi Dyende kadyena mwa kushintuluka to. Yèyè udi umwèumwè awu, misangu yònsò.

⁷² Pa nanku, Nzambi wàkapèèsha Noa diteeta, paanyima pàà yèyè mumane kwitaba cyeyemenu Cyende. Noa kubwelaye mu bwàtù. Nzambi kukanga ciibi paanyima pende. Kakùyi mpatà to bôbò bàakamba ne: “Mpindyewu, mu dinda, nekwikalè mavuba mafiike. Ne nekwikalè mikungulu ne mikenyi, ne mvula neyiloke.” Kadi, nudi bamanye’s, paakacyabu, dîbà dyakajuuka ne nsèsà anu mwàdi ne kale.

⁷³ Ndi ndifwanyikijila ne, beena kwitabuuja bàà ku mikàlù bàakamba ne: “Netuye kuntwaku. Mukulumpe awu mmufwanyine kwikala mubinge pa bwalu abu. Nanku, pàmwäpa beena maalu a mamanya bävwa batupakane, bwa ne nkufwanyine—nkufwanyine kwikala mvula muulu mwamwa.” Kadi, vùlukàayi ne, mvula kàvwakù muloke to.

⁷⁴ Kadi,ashiishe, dituku diibîdi, dîbà dyakeela nsèsà anu mùvwàdi misangu yònsò; dituku diisàtù, diinâyi, diitànù, diisambombo, mene too ne ku dya mwandamutekete. Kadi Noa ùkaavwa mubànde too ne mu cibambalu cya kuulu, bwa kwikalaye utangila mauu. Kadi mu dinda dya mwandamutekete adi, pàakalwàku cikondo, pàakabèngà bantu njila wa kàyi dyela mpatà wa Nzambi bwa lupandu, wa disungila dya myoyi ya bantu, mvula kubangayi kuloka ne milonda ya diimanshila màyi yakuula tente. Ki—ki bwàtù kubangabu kubànda, ne kufikishabu Noa ne bakwabo abu ku dikubiibwa. Bushuwa, bu mùvwàbo beeyemene Dîyi dya Nzambi, cyeyemenu, Dîyi dya mulayi dya Nzambi.

⁷⁵ Nansha mùdici cìmwèka bu cibi, ne nansha mùdici cyènda cilwa cifiike, tungunuka anu ne kwitabuuja cyeyemenu cyebe aci.

⁷⁶ Mòsà, mona’s, wèndè, yèyè wàkateeta bwa kusungila mwoyi wa beena Ebelu bakwate ne bya luse abu. Ne kwambabo

kushààla mu mushindu mubi, anyi anu bu mu mushindu mubi, anu mùdi bânà babidi batùdi tuteeta bwa kusungila diloolo edi aba. Bàvwa bapika, ne bàvwa babashebeya pààbò anu nàka, dîbà dyònsò òwàbò baswe kubashebeya adi. Ki Mòsà kuumvwaye munda mwa mwoyi wende ne aci kacivwa diswa dya—dya Nzambi nansha. Pa nanku, yêyè—yêyè kuteeta bwa kucyenzela ku dilonga dya tulaasa. Yêyè kuteeta bwa kucyenzela ku madikolela ende yêyè mwine, kadi kujandulaye ne wàkapangila byenze ne bibi. Wàkadyenzela cintu kampanda mu yêyè cìvwà kacìyi cijaalame to, bwalu wàkashebeya muntu mukwabo. Ne cyòcì aci kacivwa cijaalame nansha.

⁷⁷ Pashiishe, yêyè kuya mu cipeela ne kushààlayèmu munda mwa bidimu makumi anaayi. Kadi, dîngà dituku, yêyè ùvwa munkaci mwa kudiisha mikooko mundekeelu mwa cipeela, nenku kùvwa Bukênkè kampanda mu kaacipuka. Kadi Mòsà pààkaseemenàye pabwìpì ne bwine Bukênke ebu, Dìyì dya Nzambi dyakaakwila nende mu Dikunji dya Kapyà edi òvwà disanganyibwà mu kaacipuka aka, dyàmba ne: “Mòsà. Mòsà.”

Ki yêyè kwamba ne: “Mmémè ewu, Mukalenge.”

⁷⁸ Nenku Yêyè kwamba ne: “Kòpolà bisabaata byebe, bwalu buloba bùdi mwimanepu mbwà cijìla. Ngùmùvù mikemu ya bantu Bàányi. Ngùmùvù disangisha dyabo dya milombo. Ngävùluku ne Ntu mubènzèle mulayi.” Ekelekele, bu ne aci kacivwakù ne cya kulàkusha kapyà mu myoyi ya beena kwitabuuja beena Kilisto diloolo edi’s we! “Mémè Ndi Nzambi. Ngävùluku ne Ntu mucilaye.” Mushindu mwine wùvwà Dìyì adi dya mu Mifundu’s we! Ki kwambaYe ne: “Mòsà, Ndi nkutuma wèwè kuntwaku bwa kubasungila.” Ki Mòsà . . .

⁷⁹ Mu bushuwa bwa bwalu, anu mungãmbì ku ntwadijilu amu, paùdi wangata cyeyemenu cya Nzambi aci, cìdi cikwenzeja bintu, ee, misangu mikwabo, bya macimbu ku mèsù kwa bantu. Nudiku bafwanyine kudifwanyikijila muntu, uvwa munyeeme beena Ejiipitu awu, pàkaadìbu bucya mu dinda, paanyima pàa mumone cyeyemenu eci . . .

⁸⁰ Dìyì dya Nzambi edi kwakulaDi nende bu ntemu wa bushuwa, bwalu òvwà n’Dìyì. Mulayi wùvwakù, ne dishindika dya Nzambi munene wa bufuki awu, mwàkenzàYe cishima mu—mu bwikadi bwa Mòsà, ne muleeje ne Yêyè ùvwa Nzambi wa bufuki.

⁸¹ Ki Mòsà, pààkacyàbu mu dinda, kwangataye mukajende ne kumushikikaye pa kampundu, ne—ne mwànà mwambula ku lubèsè. Ki muntu wa bidimu makumi mwandamukulu awu, mwedi mulembelele mumufikile ne mu cifuka, ne mutu dibàlà wèngelela, mwambule citupa cya mucì cikonyangale mu cyanza, wènda ùya mutangile ku Ejiipitu, wènda wèla mbila mikole ne mwèndè mwònsò.

“Kûyaaya nkwèpì, Mòsà?”

“Mémè’s nyààya ku Ejiipitu eku, bwa kuya kakwatangana ku bukookeshi.”

“Kukwatangana ku bukookeshi?”

⁸² Dibucikilangana dyenza kùdi muntu umwepele! Bwa cinyi? Yèyè ùvwa ne cyeyemenu. Ùvwa ne cintu kampanda. Ùvwa ne Diyì dya Nzambi, pàvwàye mwa kwikala mwimanyine. Muntu wa bidimu makumi mwandamukulu, mwikàle ne kampundu, ne citupa cya mucu mu cyanza. Ki cyònsò civwàye naaci ncyôci aci. Cyenze bu dibucikila dya Russie dyenza kùdi muntu umwepele, leelu ewu. Kadi yèyè wàkayakù ne wàkakwàtangana ku bukookeshi bwende, bwalu ùvwa ne cyeyemenu. Ùvwa mwakule ne Nzambi. Ùvwa muumvwe Diyì dya Nzambi. Ki yèyè. . .Bwalu bùvwa ne, yèyè wàkacyènza. Bushuwa’s. Bwa cinyi? Cyôci civwa nende matuku ende ônsò a mwoyi. Civwa ncyeyemenu.

⁸³ Muntu nansha umwe kèna ne bukenji bwa kubànda mu cyambilu, bwa kuyiisha Evangeeliyo, pàdiyè yèyè mwine kàyi mudyate makàsà mu nsenga minsantu ayi, mùdi muntu udi mupange kwitaba ne Nzambi ùdikù anyi mwena bupidya nansha umwe kàyikù mwa kufila tubingilà bwa kuumvwija mùdi citambe-mfukilu cya Nzambi kaciyikù ne mushinga to. Yesu kàvwakù mufwanyine kulekela bayiidi Bende bàyiisha to, nansha byôbi ne bàvwa baMumanye bîmpè bya bishi; bàvwa ne cya kuya mu cimenga cya Yelusalema, kwindilamu too ne pàvwàbo bavwadikiibwa ne Bukole bwa ku Dyulu. Bàvwa ne cya kwikala bapete dilabula adi.

⁸⁴ Mòsà, bu mùvwàye mumanye ne ùvwa muprofeta, ùvwa mumanye ne wàkajuudiibwa mbwà kiipacila aku, kadi kakùyi dipetangana dya pàà nkàâyendè adi, Cyeyemenu aci, cintu kampanda civwà cimujaaadikile ne pàvwàye muye kuntwaku apu, ùvwa ùyakù bwa kupeta disungidiibwa dya bantu aba. Yèyè kàcivwakù kabidi umwèumwè awu to. Yèyè wàkayakù bwalu ùvwa ne cyeyemenu, ne wàkenza anu menemene civwà Nzambi mumwambile bwa kwenza aci. Kakùvwakù bwôwà nansha bukese mu mwoyi wende to, pààkeelàye nyoka panshi, anyi makombo, ne kwandamukawu nyoka apu. Ki batentudi bàà mu musunya abu kulwabo ne wàbò mushindu wa mudimu wa bwambi, ne kwelabo panshi ne kwenzabo cintu cimwecimwe aci. Mòsà ùvwa mwenze anu menemene civwà Nzambi mumwambile bwa kwenza. Kakùvwa cingà cintu cya dyenza to anu kushààla mupuwe ne kumona butumbi bwa Nzambi. Pashiishe tudi tusangana ne Nzambi wàkangata nyoka wende awu ne wàkamina mikwabo ayi. Mushindu awu ki wùdibi byenzèke. Yèyè ùvwa mutwishiibwe ne Nzambi mwine wàkamwambila bwa kwenza cyôci eci awu, ùvwa mwa kumucyuka mu cikondo cya bwalu bukole.

⁸⁵ Katwenaayiku diloolo edi, biimanyine pa ne nsongààlùmè mmufile mwoyi wende kùdi Kilisto, mwa kwimanyina pa cyôci cyeyemenu eci ne, Nzambi ùdi mwa kwenza ne bìdi kabiyi mwa kwenzeka kwikalabi mwa kwenzeka anyi? Yèyè ùdi mwa kushintulula myoyi ya balumbulwishi abu. Tutu tutupika ne dibinduluka dyònsò nunku bwa cinyi, pa bìdi bitàngilà bikwabo bintu? Twànjàayi kwangata Nzambi, dyambedi. Cyàlùjaayi ku mulayi awu. Nzambi's ngudi mucilaye ne—ne, Yèyè ùvwa mwa kucyenza.

⁸⁶ Pa nanku, vùlukàayi ne, Mòsà ùvwa misangu yònsò anu muntu mushiilangane bwalu ùvwa mwangate Dìyi dya Nzambi ne muDitàbùuje. Ne yèyè ùvwa ne mulayi mumushindikila.

Tudi bafwanyine kubateela bùngi kaayi? Katwena ne dîbà to.

⁸⁷ Pàmvwà mfunda tuubintu, leelu, mvwa mfunda mwab'ewu bwa Danyèlè, mushindu wùvwàbi. Cìvwà kwòkù, cìvwa ndinyooka dya lufu bu yèyè mwa—mwa kusambila nzambi mukwabo kanà yònsò ewu. Kadi yèyè ùkaavwa mulenge Nzambi, ne yèyè ùvwa mumanye ne Nzambi ùvwa ne bukole bwa kumucyuka.

⁸⁸ Bânà bàà beena Ebelu abu, bàvwa ne cya kwediibwa mu cikùtù cya kapyà ne kwoshiibwa ne luuya lukole, ciikàle ne kapyà kavudija misangu mwandamutekete kutamba mùvwà cikùtù cya kapyà aci cìteemeshiibwa kwònsò aku. Bânà bàà beena Ebelu abu bàvwa biitabuuje Nzambi. Kwambabo ne: “Nzambi wetu udi ne bukole bwa kutusungila ku cikùtù cya kapyà eci.” Bwa cinyi? Bàkaavwa bapete cyeyemenu. Bàvwa ne Dìyi dya Nzambi.

⁸⁹ Nenku Nzambi ùvwa mwa kusungila bôbò bânà bàà beena Ebelu abu ku cibambalu cya lufu cya cikùtù cya kapyà aci awu, ambàayi tũng mwabengaYe kusungila nsongààlùmè mukese wa beena Yuda ewu kaaba aka, udi usanganyiibwa mu cibambalu kampanda cya lufu muntu mwamwa ewu? Ambàayi tũng mwabengaYe kwikala... Ne Yèyè's ùcidi anu Yehowah Nzambi umwèumwè uvwaYe misangu yònsò awu. Twètù, anu bu mupostolo Pòlò, s'tudi mwa kufika ku dyumvwa ne Nzambi umwèumwè awu ùdi ne mwoyi leelu ewu ne: “Makeelela, leelu, too ne kashidi anu umwèumwè awu.” Dîbà adi, beena Kilisto's bàdi mwa kukwata ku cyanza cidi kacyi cishintuluka cya Nzambi, kadi kushintulula maalù ònsò nkòong. Disambila ditu dishintulula maalù. Ki citùdi baswe kwenza ncyôci aci.

⁹⁰ Tudi mwa kwamba bishi bwa Yoshuwa? Neasabuke Yadènè bishi? Mbimweke anu bu ne Nzambi ùvwa musalaayi wa kàyi ùmvwikakù to, anu mu ngondo mwinâyi mene, pàvwà mâyi mùle mushindu awu apu. Kadi Wàkambila Yoshuwa ne: “Angata musheete wa cipungidi nda kumpala.” Ki cyònsò cìvwà cikèngelà bwa kwenzaye ncyôci aci. Ki Nzambi kusakaYe

Yadènè paanyima ne mâyi kushiyawu buloba bûme, ne bôbô kusabuka ne kusungidiibwabo. Mushindu mwine wùvwàbi's we!

⁹¹ Kabyena bikemeshaku to pàakambà Yoshuwa ne: “Bwanyi mêmè ne bàà mu nzubu mwanyi, netukwacile Mukalenge mudimu.”

⁹² Mushindu mwine wùvwà Davidi, nkambwa munene awu, mushindu mwine wutùdi banange bwa kwakula bwa bwalu bwende's. Katwena ne dîbà to. Kadi, ne misangu yàbûngì. . . Bu mutũmvù muntu kampanda wàmba kùkaadi katanci kakese bwa Davidi ne bwa mpekaatu wende, kadi's mpàkaavwà mwine awu yêyè yônsò mumana kufwa luse. Pàvwàye uya ku mvita, ne twètù tutu tucibiikila, mu maalu a pa buloba ne: “Mbimweke bibi bipange ne mwa kubiipa,” ne dikandameena diikàle dinene. Nenku Davidi kudyadijaye kaaba aku mwinshi mwa mucu, ne kufwaye naayi, too ne mwàkuumvwàye cyona cipicila mu bikùtùkùtù bya mici ya mùriers amu, dîbà adi's byakashiilangana. Davidi kujuuka e kuyaye, bwalu wàkapeta cyeyemenu, ne yêyè wàkamanya ne ùvwa n'Nzambi ùvwa wènda kumpala kwende.

⁹³ Twètù katwenaayiku mwa kusambila disambila dya diitabuuja diikalà mwa kutuulula Nzambi panshi apa pambidi pàà beena kasumbu kàà budishikaminyi bwa munu ku dîsù abu aku anyi? Ncya bushuwa ne, tudi mwa kucyenza. Tudi twitabuuja ne tudi mwa kucyenza, bu twètù mwa kukwata ku cyeyemenu aci.

⁹⁴ “Mushindu wàkabiikilà Abraham bintu, bìvwà kabiyikù abi, bu ne bìvwakù,” bwalu yêyè ùvwa ne mulayi wa kawùyi dyela mpatà wa kùdì Nzambi, wa ne Nzambi ùvwa mwa kumupeesha wendè. . . kumupeesha mwànà kùdì Sarah. Ne pàakakùmbajà mukaji bidimu lukama, anyi mulume, ne mukaji makumi citeema: “Yêyè ùvwa anu kàyi utenkakana ku mulayi wa Nzambi ku bupidya to, kadi ùvwa ne dikanda, mwikàle ùfila butumbi kùdì Nzambi.” Ne twètù tudi twamba ne tudi bânà bàà Abraham. Pàvwà Abraham. . .

⁹⁵ Pààbi's, twètù tudi ne Bible udi mufundiibwe kacya ku matuku a Abraham, ne majaadiki ônsò atùdi bapete enda acitwa nyama ku mikolo, a ne Yehowah ùtu ùshààla mukwate ku Dîyi Dyende, a ne Kilisto m'Mwànà wa Nzambi awu. Yêyè ùdi Mutwangaji pankaci pàà bantu ne Nzambi, ne kakwenaku mutwangaji mukwabo to pa kuumusha Yêyè. Ne mwikàle ùlaya ne: “Nwènù balombe Taatù cintu kanà cyônsò mu Dînà Dyanyi, necifidiibwe.” Ne twètù tudi twamba ne tudi bânà bàà Abraham. Kadi pààbi: “Abraham wàkabiikila bintu, bìvwàku abi, bu ne kabìvwakù to, bwalu ùvwa mwitabuuje Nzambi.” Kakùyi mpatà to. Mêmè ndi nciitabuuja ne mwoyi wanyi wônsò.

Nsòmbelu wa Pôlô mushindameene pa Kilisto awu ki civwà cyeyemenu cyende. Ki civwà cimuswike.

⁹⁶ Kilisto ùvwa cyeyemenu cya dibiishiibwa dya ku lufu, mutùdi tubala kaaba aka. Wàkamba ne: “Nzambi wàkadicipa mu mucipu, wàmabila Davidi ne, Yêyè kàvwa mwa kulekela musuuka Wende mu iferno to.” Mucipu ki ndekeelu wa dikokangana dyònsò. “Nenku Yêyè wàkadicipa ne Kàvwa mwa kulekela musuuka Wende mu iferno to, kadi Ùvwa mwa kuMujuula.” Nenku ki bwa cinyi Yêyè wàkeeyemena Nzambi, ne wàkapoopediibwa pa nkuruse; wàkafwà, wàkabiika ku lufu, ne wàkabànda mu Dyulu, bwalu Wàkiitabuuja Nzambi.

⁹⁷ Ambààyaaku tǔng, bwa mwakafilaYe cileeji, mutùdi mwa kubenga kwangata cyeyemenu aci! Pìikalàbi ne Kilisto wàkacyàngata, pa mulayi wumwepele awu, ambààyaaku tǔng mutùdi twètù katùyi mwa kucyangata, ne milayi binunu! Nenku biikàle ne Mashi a Yesu Kilisto mwaba awu bwa kukezula njila wetu, ne kutusambwisha lubùwà lunene lwa mpekaatu, lùvwà lututapulule ne Nzambi, lwa bupidya alu, ne kutubweja buludi mu Bwikadi Bwende, bwa twètù kwakulaku Nende, ambààyaaku tǔng mwapangabi kwikala nanku! Eyowa’s. Bidi bikengela bwa twètù kwikala ne cyeyemenu kampanda.

⁹⁸ Nyewu ntuma meeji ku muntu kampanda mpindyewu mene, pànkaadi njikija apa, udi mufwanyine kwikala George Washington, pàcìvwà Amerike mwànà mutekete ne twètù tulwà mvita bwa kushàala ne mwoyi, mwoyi wa ditunga dinene ditùdi naadi edi. George Washington ùvwa mwena Kilisto. Ùvwa mwena kwitabuuja. Nenku ku Valley Forge kwaka, bàtu bandondele ne basalaayi bàà Amerike, anu pamwe ne cyabisatu cimwe cyabo, ki bàvwàku ne bisabaata. Kadi movù wa mashika pààwù kuulu kuvwa mashika makole, mashika a nkàmishamashi, ne musulu mukwate dibwe ne mùle pàà mikuna yibidi. Ne ba-Britanniques biikàle lukwabo luseke. Ne mwoyi wa ditunga dikese edi wùkaavwa pabwìpi.

⁹⁹ Cyakenzaye ncinyi? Yêyè ùvwa mwena Kilisto. Yêyè kupatuka mu mēbà a bufuku ne kutwaye binù mu nêjè, ne kusambilaye too ne pàakashààlaye mubole bolebole ne màyi a nêjè awu mamufikile too ne mu cifuka. Nenku yêyè wàkashàala mwaba awu ùsambila too ne pàakapetàye cyeyemenu, dyandamuna dya kùdi Nzambi, dya ne Nzambi ùvwa ne cya kumupeesha bucimunyi.

¹⁰⁰ Nenku dituku dyàkalondà, Valley Forge kàvwakù cintu bwende yêyè to. Kusabukaye Delaware, kupicilaye mu mabwe a mashika amu ne basalàayi bàvwà kabàyikù ne bilàmbà biine pambidi to, bàmba kuminyina ne mashika, biikàle ku makàsà kutupu panshi apu, mu nêjè amu. Ki kucikwataye, pàakatùbulàbo cinkutu cyende kùdi mazaji asatu a cingoma. Bwa cinyi? Ùvwa mweyemene cyeyemnu cya disambila dyandamuna. Amen. Bishimikidi biine bya ditunga dyetu’s mbyashila pa cintu cya mushindu awu aci.

101 Lutatu lùdì naalu bantu leelu ewu bàdì bàdyamba mùdìbo beena Kilisto lùdì ncinyi? Tudi tutacishiibwa mu dībà bu nunku bwa cinyi? Katutacishiibuku to. Twikalààyi masalaayi. Eyowa's, mukalenge.

102 Wàkasambila too ne pààkapetàye dyandamuna adi. Dībà adi, kakùcìvwakù musulu muvwanduluke to, kakùcìvwakù bya basalaayi ku makàsà kutupu abi to, nansha mùvwà maalu amweka amu, bàvwa mwa kucikwata bwalu Nzambi ùvwa mwambe nanku. Dizaji kadìvwa difwanyineku mene kumushebeya to, dya ku cingoma cya mulwishi adi. Cya bushuwa. Bwa cinyi? Yèyè's ùvwa mwenze disambila dya milombo. Wàkapeta dyandamuna.

103 Mushindu mwine wùvwàbi bîmpè bufuku kampanda, pàvwà mupostolo Peetèlò usanganyiibwa mu buloko, ne biikàle ne cya kumushebeya mu dinda dya pàvwàbu bucya. Ùvwa ne cya kufwa ku dinyooka dya lufu, mwikalà mwena Yuda mutekete ewu mwa kushebeyiibwa mpindyewu. Kadi cyakenzabo ncinyi? Bààkenza cintu anu cyòcì cimwecimwe citùdì twètù muneemu mu Houston tuteeta bwa kwenza eci. Bààkenza disangisha dya milombo kumbelù kwa Yone Maakò. Pàvwàbo munkaci mwa kusambila apu, Mwanjelo wa Mukalenge wàkaya ku buloko aku, ne wàkakàngula milonda ya ku buloko, ne wàkunuzulula biibi. Ne paanyima pàà cyòcì aci, kupatulaye Peetelo pambelu, ne kulwaye tamakatamaka too ne ku disangisha dya milombo adi.

104 Mèmè ndi ngiitabuuja, diloolo edi, ne Nzambi umwèumwè awu ùdì ne mwoyi. Yèyè kayi Nzambi umwèumwè awu to, nanku kùdì cintu kampanda cipampalamuke. Cya bushuwa's.

105 Cyakenzeka ku cinyi? Ku disangisha dya milombo, kùdì beena Kilisto bàà lulamatu bàvwà biitabuuje, ne biitabuuje ne Nzambi ùvwa mwa kusungila mwanààbò awu ku dinyooka dya lufu adi. Bàvwa mbeena Kilisto bààkashààlà bufuku bujima ne batwe mpala yabo panshi, ne beele mbila ne basambile.

106 Mùngũmvù umwe wa ku bambi, katanci aka, wàmba ne yèyè neikalè mwa kwela mbila, bufuku bujima. Lutatu lùdìku lùdì ne, leelu ewu, bantu mbatekete mu maboko. Bàdì bàcyòka, bàbùngila. Kabeenaku nansha mwa kushààla basòmbe too ne ku ndekeelu mu disangisha dya tusunsa dikumi etu to, mbibakolele. Ee, s'—s'ncintu cibi.

107 Wèwè munange Nzambi, ee, ee, s'biwvakù bikengela bwa twètù kwikalà badibwinke mu mudimu. Bìvwa bikengela kwikalaci ditekemena dyetu—dyetu, majinga etu. Ki cìvwà cìkèngelà. Bìvwa bikengela bwa cyònsò cidì munda mwetu kwikalaci mu dinanga dya Kilisto. Amen. Twètù tudi tushààla basòmbe mu lulèngù lwa menemene. Tudi tushààla basòmbe menemene anu bu ne bwalu kî mbututangile to, pàdibi ne buloba ebu bùdì munkaci mwa kupùnga ne lufu mwinshi mwa makàsà etu. Ncya bushuwa's. Myoyi ya bantu yenda yipatuka, kabàyi ne

Nzambi, kadi twêtù tushààla basòmbe menemene anu bu ne—ne bwalu abu kî mbututangile to. Bu mùdibi ne tùdi bàà mu ekeleeziya kampanda, ki cyònsò citùdì twêtù twela meeji ne ki cidì cyènza dishiilangana.

¹⁰⁸ Mvwa ngaakula pa Dilwa dya Kilisto, mbingu mikese yìdì mishààle eyi, mu ekeleeziya kampanda. Ki paanyima kulwaku muntu kampanda ne kutwilanganaye naanyi mundekeelu mwa ekeleeziya amu, kwambaye ne: “Mwaneetu Branham, wêwè’s udi uciinyisha bantu bya bafwanyine bààvwa kufwa’s.”

Mémè kwamba ne: “Ndi ngenza nanku bishi?”

¹⁰⁹ Yêyè ne: “Ee, wêwè udi wakula bwa Dilwa dya Kilisto. Mémè ncìtu muswe kuumvwa bintu bya bu nanku to. Ndi ne mwanàanyi wa balume mutekete kaaba aka ùndì muswe kukolesha. Ndi ne mwanàanyi wa bakaji mucikàle ùlònga kalaasa.”

¹¹⁰ “Kaa,” mûngàakambà, “Dilwa dya Mukalenge’s ki cintu cidì citambe kwikala cya butumbi cindiku mémè mufwanyine kwelela meeji.” Cya bushuwa’s. Nwamonu anyi?

¹¹¹ Bible mmwambe ne: “Aba bònsò bàdi *banange* dimweneka Dyende.” Kaa, ekelekele, bwa dituku diikalà cya kale cya cifwaka eci mwa kuvwala dibenga-kufwa, ne diikalà nzubu wa beena cikupi mùndì musòmbèle emu ewu—ewu mushintuluke, mu katanci, mu mubunyi wa dísù, ne mubidi mufwanangane ne Wèndè mubidi Yêyè mwine wa butumbi awu! S’ki civwà cikèngelà kwikala dijinga dya mu mwoyi bwa Ekeleeziya. Bìvwa bikengela bwa muntu mulume ne muntu mukaji yònsò, bwa kwikalabo bàlàkuka kapyà, benda bàyiishangana mu mùsèèsù ne mu myaba mikwabo yònsò, bàteetakù bwa kufikisha misuuka ku disungidiibwa. Cya bushuwa’s.

¹¹² Ndi mémè munkaci mwa kudikonka ní tudi bulelela baswikila ku ciine cyeyemenu citùdì tulakila mukana twamba mutùdi baswikiibweku aci’s. Tudi batangile ku mutooto wa mu dinda wa cya bushuwa awu anyi? Patwikalà beeyemene anu ekeleeziya wetu ne dingumba dyetu, diswikakanaku dyetu; pàdì buloba bushintuluka apu, bùdi bushintuluka pamwe ne cyòci aci, bwenda bunyunguluka bwenda bunyunguluka.

¹¹³ Kadi kùdi Mutooto wumwepele wùtù wòwò kawuyi wushintulukaku to. Kùdi cintu cimwepele cidì kaciyiku mwa kushintuluka to, ki Nzambi. Nzambi kèna mwa kushintulukaku to. Dìyì Dyende kadyena mwa kushintulukaku to. Bible Wende kèna mwa kushintulukaku to. Ne muntu yêyè mulediibwe ku Nyuma wa Nzambi, mwikàle ne Kilisto munda mwende, cidì citwa “amen” ku mulayi wònsò. Aci’s ncyà bushuwa. Cya bushuwa.

¹¹⁴ Kaa, bushuwa, disangisha dya milombo ki didì ditùkèngela. Tudi ne cya kwikala beena Kilisto. Beena Kilisto bònsò bàdi ne cya kukwata mudimu ne cyeyemenu cimwecimwe eci, Dìyì dya

Nzambi. Bwa mwena Kilisto Dîyi dya Nzambi ki nshinga udi mukwate bwâtù.

115 Yesu wàkamba, mu Dîyi Dyende ne: “Nwênù bashààle munda Mwanyi, Mèyi Àànyi mashààle munda mwenu, dîbà adi nudi mwa kulomba cinùdi baswe, ne nebànwènzèlèci.” Anji elààyibi meeji ku bwalu abu. Ncinyi cikwabo cyùdiku mufwanyine kwangata bu cyeyemenu? Ncinyi cyùdi mufwanyine kweyemena kutamba cintu cya mushindu awu? “Nwênù bashààle munda Mwanyi, Mèyi Àànyi mashààle munda mwenu, dîbà adi lombaaayi cinùdi baswe aci.”

116 Kulomba bwa Nzambi akwate mudimu pa mwoyi wa mulumbulwishi awu, anyi beena kasumbu kàà budishikaminyi bwa munu ku dîsù abu, ne kupatwishaku nsongàalùme awu mu cibambalu cya lufu aci! Twètù bacilombe ne diitabuuja, biikàle twitabuuja, mu masangisha a milombo aa, netucipete. Bwa aci, mèmè ndi ngiitabuuja anu Nzambi mushindu awu.

117 Kadi dyanyi diitabuuja dîndi naadi kùdi Nzambi, ki bwa cinyi ndi kaaba aka diloolo edi. Ki bwa cinyi ndi mulekele cintu cikwabo kampanda cimvwa ne cya kwenza, ne mulwe muneemu emu. Bìdi bikengela bwa mèmè kwendesha mashinyi ntanta wa kilòmèètà nkama diloolo edi, bwa kwalukila ku Tucson, ku Arizona, bwalu ndi mulwe bwa kuteeka diitabuuja dyanyi pamwe ne dyenu. Yèyè awu’s mmuntu. S’mmusuuka wùdi wùsanganyiibwà kuntu kwaka awu. S’mmuntu kampanda mwikàle mu dijinga. Nenku twètù beena Kilisto butùdi naabu mbwa kutabuluka ne kufika ku cintu cilelela, ku diitabuuja dishuwashuwale dya menemene. Kudiswikila ku Dîyi dya Nzambi, ne kulomba mulayi awu. Eyowa’s, mukalenge. Kaa, ekelekele! “Nwênù bashààle munda Mwanyi, ne Dîyi Dyanyi munda mwenu, nùlombàayi cinùdi baswe aci.”

118 Kabidi ne: “Bantu bàdi bàbìikidiibwa ku Dîna Dyanyi bôbò badikùngwije kaaba kamwe basambile, dîbà adi Nènteelejilè mu Dyulu.” Disangisha dya milombo, s’ki cyôci aci.

119 Ntu ngiitabuuja bya diyikila ne balumbulwidyanganyi ne diyikila ne baakwidyanganyi, anyi balumbulwishi, anyi beena tusumbu twa budishikaminyi bwa munu ku dîsù, anyi bikwabo byônsò abi. Aci cìdi anu cîmpè. Kadi, mwaneetu, ditekemena dyebe dyôdi kadiyi diswikiibwe ku cintu kampanda citambe cya anu bantu bàa meeji a musunya abu to, anyi meeji a bantu’s we, wèwè’s newediibwe mâyi ku makàsà bya byènza ne dibungama.

120 Kadi bu wèwè mwa kwikalaku mwa kuswikila diitabuuja dyebe mu mwaba wa wèwè mumanye, ne kushààlamù ne kusambila too ne pàdi Nzambi wàndamuna, ne wèwè mumanyè mu mwoyi webe amu ne wacipeci, cintu kampanda’s necyenzeke.

121 Mèmè nkààdikù mumonemone bafwe bàjuuka mu nzubu wa bitalu. Nkààdikù mumonemone mèsù a—a bampofò atabala, maci a bampudimaci ajikuka. Nkààdikù mumonemone bantu

baneka kùdì disaamà dya kansere, biikàle ne kansere kàà mapondo-mapondo, nsudi, bondopiibwe ku bukole bwa Nzambi wa Bukole bwònsò. Bwalu, bàvwa ne diitabuuja dya kwitabuuja ne Nzambi awu, Wàkenza mulayi awu, ùvwa mwa kwikala ne bukole bwa kushààla mukwate ku mulayi Wende awu. Ki diitabuuja dilelela, dishuwashuwale dya bwena divwà naadi Abraham ndyôdì adi.

¹²² Dìswikilaayi kwôkù aku. Shààlaayi mwaba awu nusambile. Kanùyi anu nutwa binù cyanàànà, ne: “Nzambi, sungilaku nsongàalùmè udi mukwate ne bya luse ewu umwaluje kumbelu” to. Twètù bònsò tudi bafwanyine kunanga aci. Kadi tùshaalàayi mwaba awu too ne pìkalà cintu kampanda cyenzêke. Kaa! Cintu kampanda cyôcì cyenzêke, dîbà adi, ditwishiiibwa adi’s ndifwanyine kumata munkaci mwa dyanza dikese dya bantu bàdì basòmbe mu dibalaasa edi diloolo edi aba, ndifwanyine kumata munkaci mwetu mwab’ewu mene, diitabuuja ne bukole bwa Nzambi bûngì bukumbane, bu twètù mwa kusambila bafwileku, too ne patwafika ku kiipacila, too ne pàdì cyeyemenu aci cituuluka, Dikunji dya Kapyà dimwedimwe dyakakwatabo fôtò muneemu mu Houston adi, ku cyamu cya fôtò cya Ted Kipperman, kùkaadi bidimu dikumi ne bibidi. Yêyè ùdì kaaba aka diloolo edi, mwikàle munene anu mùvwàYe musangu awu amu, bwa kusungila nsongàalùmè awu, bu twètù anu mwa kuciitabuuja cyanàànà, bwalu Yêyè ùdì umwèumwè awu makeelela, leelu, too ne kashidi. Ndi mêmè nciitabuuja ne mwoyi wanyi wònsò. Ki bwa cinyi ndi kaaba aka bwa kulambula disambila dyanyi pamwe ne nwènù bònsò bwa Nzambi wasungilaku mwoyi wabo.

¹²³ Dîbà adi, bu wêwè mwa kusambila mufwileku, too ne paùdì upeta dyandamuna, paùdì upetulula ditwishiiibwa, bu mwàkadìpetà Washington amu, bu mwàkadìpetà Yone Maako amu, bu mwàkadìpetà Danyèlè amu, bu mwàkadìpetà Mòsà amu, too ne paùdì upeta cyeyemenu kampanda, cintu kampanda cya wêwè umanya ne udi mwa kwelaku lwongò, dîbà adi ne: “Pa cyeyemenu eci Nêngiibakilèpu Ekeleeziya Wanyi,” ne tubàdì twònsò mu ditunga emu katwenaku mwa kukandameena Aci nansha. Ncya bushuwa. Pa Cyôcì aci!

¹²⁴ Nzambi mwine uvwa mwa kwangata keena Yuda kàà dyûlù dikonyangale bu Pòlò aku awu, kafùke munda ne munkaci mwa kuya kuntwaku bwa kushebeya beena Kilisto bònsò ku dinyooka dya lufu, ne uvwa mwa kumushintulula ne kumuvwija mwena Kilisto mulenga wa dikema awu, Nzambi umwèumwè awu udi ne mwoyi diloolo edi, mwikàle mwa kushintulula mikenji yilwa ngàsà, dîbà kanà dyònsò didìYe upeta meeji a kucyenza adi. Aleluuyah! Nenwìkalè mwa kumbiikila munsantu mubunguluki wa mu malaba, nwènù biine, pa nanku’s mbipiciibwe ne mêmè kwasa dibunguluka mpindyewu mene. Mêmè ndi ngiitabuuja Nzambi awu. Amen. Eyowa’s, mukalenge.

125 Pashiishe Maakò 11.22, paùkaadi musambile mufwileku. Yèyè mmwambe ne: “Bulelela, bulelela, Ndi nnwambila ne, ikàlaayi ne diitabuuja kùdì Nzambi. Mémè ndi nnwambila ne, wèwè mwambile mukuna ewu ne: ‘Tentemuka.’” Cyeyemenu aci pàkaadìci cilwe kùdì apu, paùkaadi mulaaba kùdì Nyuma udi ulwa mupite too ne bukontononyi bwa maalu a mamanya kule ne kule awu, kumpala kwa kwikalaku nî nkapwishopwishi anyi nî nkasùnsukilà, Yèyè wàkaakula ne bintu byònsò kulwabi ku diikalaku awu, nenku pàdi musuuka webe wupayika lwongò ku cyòci aci, kakwena cintu nansha cimwe cìdì mwa kuwimanyika nansha. Ncya bushuwa. “Ambila mukuna ewu ne: ‘Tentemuka,’ ne kùyi wela mpatà munda mwa mwoyi webe, kadi witabuuja ne ciwàmbi aci necyenzeke, udi mwa kupeta ciwàmbi aci.” Bwa aci cyòci kacìyi cyeyemenu cya kukwataku to! Ncya bushuwa ne, ncyòci. Ncya bushuwa, cyeyemenu.

126 Mpindyewu, ditunga dîtu ne cyeyemenu. Nsòmbelu wenu wa mu dîkù ùdì ne cyeyemenu. Myaba yònsò, byòbì ne neciikalèku mwa kukumbaja cintu kampanda, bìdì bikengela ciikàle ne cyeyemenu.

127 Tudi twanyisha mwine mulumbulwidyanganyi ewu. Tudi twanyisha, kaa, bantu bakwabo bònsò abu. Muiyishi wa mu basalaayi wa maalu malenga wa ku Californie ewu, ne diyishi bulengadi kaayi’s we! Ne—ne mwaneetu wa balume waditacishi bwa kwangata mfranga ewu ne bikwabo byònsò, bwa kuteeta bwa kwambulwishaku mukaji udi mukwate ne bya luse ewu, ne—ne yèyè ne bânà bende, bwa kubasungila. Byònsò abi’s mbilenga. Tudi twanyisha cyòci aci, ne mémè ndi nciitwa nyama ku mikolo.

128 Kadi kùdì cintu cimwepele cìdì citambe aci, nwènù balunda bàànyì, patùkaadi twoya disangisha edi diloolo edi apa: Tudi ne cya kuciswikila ku cyeyemenu kampanda, disangisha dya milombo kumpala kwa Nzambi, diikalà mwa kutuma disungidiibwa dya kùdì Yehowah Nzambi umwèumwè awu. Yèyè ùdì Nzambi anu mùvwàYe musangu awu amu. Aleluuyah! Nudi nuciitabuuja anyi?

129 Tùjuukilààyaaku kuulu, dîbà adi, bwa diloolo edi twènzè disangisha dya milombo muneemu emu, too ne pènzèkà cyeyemenu kampanda. Twèlààyi byanza byetu muulu kumpala kwa Nzambi. Sambila too ne paùdì ukafika pa kiipacila, too ne pàdì cyeyemenu kampanda cimata mu mwoyi webe.

130 Mukalenge Nzambi, tuululaku Nyuma Mwîmpè Webe, tuma aye kasuulula bânà abu kuntu kwaka, Mukalenge. Mbasòmbè mu myaba ya mindidimbi ya lufu. Cintu kampanda cìdì pabwîpì ne kwenzeka, Mukalenge, ne tudi tulomba bwa masangisha a milombo aa atudike Kapyà. Ndi Nkwitabuuja, Mukalenge. Ndi nciitaba, ne ndi ngiitabuuja ne Wèwè neusungile bânà abu.

Enzaku nanku, Nzambi wa Bukole bwônsò. Twêtù, Ekeleeziya Webe, mbàdì bàcilòmba aba, ku Yesu Kilisto. Amen.



CYEYEMENU LUA63-0304

(A Absolute)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dimwe diòlò, mu matùkù a4 a ngondo mwisâtù, cidimu cya 1963, ku City Auditorium mu Houston, Texas, U.S.A. Ndyumusha pa mukaba wa mêyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org